



Adxunto se remite certificación do acordo adoptado polo Pleno desta Corporación, en sesión ordinaria celebrada o día 29 de maio de 2017, e relativa á “Moción do grupo municipal Moveneda, sobre o proxecto de orzamento do Estado para 2017”.


Vila de Neda, 5 de xuño de 2017
O Alcalde.-



Asdo/ Angel Alvaríño Saavedra

Federación Galega de Municipios e Provincias
Rúa Varsovia 4C, 6º andar - Área Central
15707 Santiago de Compostela

1944



1944



CERTIFICADO ACORDO PLENO

D. ALEJANDRO R. ANTELO MARTINEZ, Secretario do Concello de NEDA.-

CERTIFICA: Que o Pleno deste Concello, na sesión ordinaria levada a cabo o día 29 de maio de 2017, e por maioría absoluta dos asistentes desta Corporación, adoptou entre outros o seguinte acordo, transcrito literalmente na súa parte dispositiva:

6º.- MOCIÓN DO GRUPO MUNICIPAL MOVENEDA SOBRE O PROXECTO DE ORZAMENTO DO ESTADO PARA 2017

O portavoz da formación, Sr. Pita Galego, da lectura á moción do seguinte tenor literal:

EXPOSICIÓN DE MOTIVOS

O pasado 4 de Abril o goberno de Mariano Rajoy presentou un proxecto de orzamentos do Estado cuxas liñas mestras fundamentais son o recorte no investimento, no medio ambiente, nas infraestruturas e sen ningún tipo de partida novidosa no que ten que ver coa política social. Ademais da continuidade na regresión social das políticas deste executivo, o orzamento contén dúas disposicións adicionais que afectan directamente á autonomía dos Concellos.

A Disposición Adicional número 27, titulada “Limitacións á incorporación de persoal laboral ao sector público” nega a posibilidade de incorporar como empregados públicos ás persoas traballadoras en empresas contratistas de obras ou servizos públicos no caso de que os contratos “se extingan polo seu cumprimento, por resolución, incluído o rescate, ou se se adopte o secuestro ou intervención do servizo”. Isto faise extensible ao persoal laboral que preste servizos en sociedades mercantís públicas, fundacións do sector público, consorcios, en persoas xurídicas societarias ou fundacionais que vaian a integrarse nunha Administración Pública.

A Disposición Adicional número 35, titulada “Esixencia de responsabilidades nas Administracións Públicas e entidades dependentes das mesmas por utilización da contratación laboral”, prohíbe que os órganos competentes en materia de persoal en cada unha das Administracións Públicas e das entidades que conforman o Sector Público Instrumental poidan atribuír a condición de indefinido non fixo a persoal cun contrato de traballo temporal,



nin ao persoal de empresas que á súa vez teñan un contrato administrativo coa Administración respectiva, salvo por sentenza xudicial. Ademais, o apartado terceiro desta disposición adicional ameaza coa esixencia de responsabilidades ás persoas titulares dos referidos órganos de persoal, no caso de contraviren esta norma.

Estas dúas disposicións relativas ao persoal das empresas concesionarias que se inclúen no Proxecto de Lei de Orzamentos Xerais do Estado, xunto coas limitacións da taxa de reposición de persoal ao servizo das administracións públicas que constitúe a denominada doutrina Montoro, impiden de facto a súa subrogación por parte dos concellos ou entidades de dereito público que deles dependan.

Esta reforma chega despois duns anos nos que as administracións públicas perderon o control do servizo público e acabouse por impor o interese privado de xeito que o lexislador non só non corrixiu os abusos empresariais senón que preparou e facilitou a súa comisión.

É un ataque directo contra os procesos de reversión de privatizacións por parte dos concellos. É un ataque, por tanto, cara á xestión directa dos servizos públicos, un dos mecanismos empregado polos concellos para poder levar a cabo unha atención planificada, regulada e participada.

É a xestión directa a que permite aos concellos levar a cabo unha mellor atención á cidadanía, con maior capacidade de regulación sobre o funcionamento do servizo, favorecendo así a posta en marcha de mecanismos redistributivos, como o cobro pola prestación de servizos en función da renda.

Ademais, a prestación directa de servizos permite exercer un control máis eficaz e transparente sobre a súa execución. Non só no referido á fiscalización da súa eficiencia, senón tamén no ético da súa actividade.

Nos últimos anos, as ansias privatizadoras de todos os gobernos en todos os niveis da administración deron de si menos servizos públicos, máis caros e peores. Pero ademais unha opacidade tras a que se ocultaron e ocultan tramas de corrupción diversas.

As tramas Gürtel, Zeta ou Pokémon, por mencionar unicamente casos ocorridos en Galicia, son episodios que non se explican sen a externalización ou a privatización de servizos. Cada un destes casos está cargado de cobros de comisións irregulares, de contratacións irregulares e de adxudicacións absolutamente discrecionais.



Pero ademais de amparar indirectamente este tipo de prácticas, as disposicións referidas contraveñen directamente o artigo 85.2 da Lei 7/1985, de 2 de abril, que establece que os servizos públicos de competencia local haberán de xestionarse do xeito máis sostible e eficiente, ben a través de xestión directa, ben por un organismo local, a través de entidade pública empresarial local, ou por unha sociedade mercantil local. Se estas disposicións adicionais entraran en vigor, este artigo quedaría, na práctica, sen efecto.

Por estes motivos, propónse ao Pleno do Concello de Neda a adopción do seguinte

ACORDO

1.- Rexeitar o intento de interferir na autonomía da administración municipal a través das Disposicións Adicionais Vixésimo Sétima e Trixésimo Quinta do Proxecto de Lei dos Orzamentos Xerais do Estado para 2017, que pretende impedir os procesos de remunicipalización e xestión pública de servizos externalizados a través de concesións administrativas ou doutros contratos de servizos.

2.- Solicitar aos grupos políticos con representación nas Cortes Xerais que, no prazo de tramitación do Proxecto de Lei dos Orzamentos Xerais do Estado para 2017, propoñan e apoiem a supresión das disposicións adicionais Vixésimo Sétima e Trixésimo Quinta.

3.- Instar á Federación Galega de Municipios e Provincias e á Federación Española de Municipios e Provincias a manifestarse en contra das Disposicións Adicionais Vixésimo Sétima e Trixésimo Quinta do Proxecto de Lei de Orzamentos Xerais do Estado para 2017.

VOTACIÓN: O Pleno, en votación ordinaria e por maioría absoluta, con 9 votos a favor dos Sres. concelleiros de PSdeG-PSOE, MOVENEDA e GRUPO MIXTO, e 4 votos en contra dos Sres. concelleiros do PP, presta aprobación á transcrita moción.

E para que conste aos efectos pertinentes e coas reservas que establece o artigo 206 do R.D. 2568/86 do 28 de novembro, pola que se aproba o R. De O.F. e R.X. das corporacións locais, expido e asino a presente, co praxe da Presidencia, na Vila de Neda, a cinco de xuño de dous mil dezasete.

Vº. e Praxe,
O ALCALDE,-

